



NATIONAL SENIOR CERTIFICATE EXAMINATION
NOVEMBER 2016

ISIXHOSA ULWIMI LOKUQALA OLONGEZELELWEYO: IPHEPHA I
ISIXHOSA FIRST ADDITIONAL LANGUAGE: PAPER I

Ixesha: 2½ Iiyure

Amanqaku: 100

QAPHELA

1. Eli phepha linamaphepha ali-14.
 2. Phendula yonke imibuzo esephepheni.
 3. Funda ngenyameko, uphendule imibuzo ngokwemiyalelo yayo.
 4. Imibuzo yonke mayiphendulwe ngesiXhosa.
 5. Umthamo wempendulo mawukhokelwe ngamanqaku.
 6. Pela amagama kakuhle, wenze imihlathi ngokufanelekileyo.
 7. KwiCandelo C **unyanzelekile** ukuba uwuphendule umbuzo **3.1**, umbongo ongamiselwanga.
 8. Bhala cocekileyo.
-


ICANDELO A

UMBUZO 1

Funda ezi zicatshulwa zilandelayo ngenyameko uze uphendule imibuzo engezantsi kwazo:

1.1

ABAFUNDI BAFUNA UMBUTHO WABO!



MNU. HANI: Malungu ekomiti, nibizwa ndim. Mandicele uxolo kuqala, kuye kwanyanzeleka ukuba sibize le ntlanganiso ngokukhawuleza. Ndiza kuninikezela kuprinsipali wesikolo.

UPRINSIPALI: (*Ukhathazekile.*) Molweni nonke. Izolo ndifikelwe ngabafundi besithi bafuna iLRC (*Learners' Representative Council*). Bathi bafuna abantu abaza kubamamela. Le nto ndiyithathe kancinci.

ABAFUNDI: (*Bangene betyhilizana.*) Zisa apha izitshixo! Hamba umke ungaze uphinde ubuyele kwesi sikolo!

UPRINSIPALI: Anzima amaxesha esiphila kuwo. Bendingazi ukuba aba bantwana bandicaphukela kangaka. Ingaba kwenzeke ntoni ebantwaneni bethu?

ABAFUNDI: Makaphume aphele apha. Asimfuni kwesi sikolo.

UPRINSIPALI: (*Ethetha yedwa.*) Inokuba ndenze ntoni bethu? Andizange ndiphathwe kakubi ngolu hlobo.

MNU. HANI: Makubizwe intlanganiso yabazali, baze kuzivela ezi zinto zithethwa ngabantwana babo.

UPRINSIPALI: Unyanisile. Ndiyaqala ukuyibona into enje.

MNU. HANI: Kunje nakwezinye izikolo prinsipali. Abantwana bathi ixesha ngoku lelabo; abafundi bathi ukuba bafuna izicelo zabo zimanyelwe kufuneka balwe.

UPRINSIPALI: (*Edanile.*) Ndiyabona ukuba kunjalo abantwana bangoku bathi banamalungelo. Into endikhathazayo kukusuka balwe bonakalise impahla yesikolo.

MNU. HANI: Mna into endingayithandiyo kukusuka balwe xa befuna into. Ubundlobongela bona andihambisani nabo.

UPRINSIPALI: Bendingazi ukuba andifunwa apha. Ndiphantse ndafela kule ofisi.

[*Isisombululo sethu-isiXhosa Ibanga 9: J. N. Mdekazi*]

- 1.1.1 Nika isizathu esibangela ukuba abafundi bafune kubekho iLRC. (1)
- 1.1.2 Ingaba oko bakufunayo bakufuna ngendlela efanelekileyo/elungileyo? Xhasa impendulo yakho. (2)
- 1.1.3 Uprinsipali usithathe njani isicelo sabafundi? (1)
- 1.1.4 Ucinga ukuba kutheni uMnumzana Hani esithi makubizwe abazali? (1)
- 1.1.5 Ingaba uprinsipali uziva njani? (1)
- 1.1.6 Kutheni uprinsipali evakalelwa ngolu hlobo uluchaze ku-1.1.5? (1)
- 1.1.7 Yintoni le angahambisani nayo uMnumzana Hani xa abafundi besilwela amalungelo abo? (1)
- 1.1.8 Khangela/Chonga **isimnini** kule ntetho ilandelayo uze usibhale phantsi:
"Ndiza kuninikezela kuprinsipali wesikolo". (1)
- 1.1.9 Bhala **isichasi** seli gama: "Unyanisile". (1)
- [10]**

1.2 Funda lo mhlathana ulandelayo, wakugqiba uphendule imibuzo:

MASIZIPHATHE KAKUHLE IZILWANYANA.

- 1 Izilwanyana zisengozini yokubulawa kule mihla. Abantu baphinde batshabalalise neendawo eziphila kuzo izilwanyana. Ezi ndawo zezifana namahlathi, umhlaba kunye nemilambo. Abantu bagawula amahlathi kuba befuna ukwakha izindlu, iifama, iindlela, iidolophu, nokwenza ifenitshala. Izilwanyana ziba sengozini yokuzingelwa ngabantu. Ziphelela zihamba kwezi ndawo bezikade zingamakhaya azo okanye zife.
- 2 Umbutho olwela ukukhuselwa kwezendalo i-*Echo* uthi urhulumente makabeke umthetho wokuba zingazingelwa izilwanyana kungathengiswa nemveliso yazo. Lo mbutho uthi urhulumente makanyanzelise ukuba kungasetyenziswa iikhemikhali ezifana neDDT (*dichlorodiphenyltrichloroethane: an insecticide*). IDDT sele yapheliswa kuba iintaka zazisifa kakhulu. Yathi yakupheliswa iDDT, zatsho zanda ezo ntaka.
- 3 Oogqirha bezilwanyana bakholelwa ukuba zikhuselewe ezi zilwanyana kwiindawo eziphila kuzo ngokuthi kubekelwe bucala umhlaba othile efama, iindawo ezifana neepaki. Kwezo ndawo zingagcineka kakuhle **zikhuselekile** kubazingeli nakwezinye iingozi.

[KwaXhosa zibenza zibutya. Ibanga 8: N. Mkhulise nabanye]

1.2.1 Funda kumhlathi woku-1.

- (a) Yintoni enye into eyenziwa ngabantu ngaphandle kokubulala izilwanyana? (1)
- (b) Nika indawo ibe NYE apho zihlala khona izilwanyana. (1)
- (c) Nika isizathu sokuba abantu bagawule amahlathi. (2)
- (d) Uthi umbhali izilwanyana ziphelela/zigqibela zisenza ntoni xa zizingelwa? (1)

1.2.2 Funda umhlathi wesi-2.

- (a) Umbutho olwela ukhuseleko lwezilwanyana uthini ngokukhuseleko lwezilwanyana? (2)
- (b) Yintoni eyabangela ukuba iDDT ingasetyenziswa? (1)
- (c) Ingaba wabakhona umahluko yakuyekwa le khemikhali? EWE okanye HAYI. Xhasa impendulo yakho ngokucaphula apha kwisicatshulwa. (2)

1.2.3 Funda umhlathi wesi-3.

- (a) Oogqirha bezilwanyana bathi zingakhuseleka njani izilwanyana? Nika impendulo ibe NYE. (1)
- (b) Bhala eli gama libhalwe ngqindilili **kwisilanduli**. (1)

[12]

1.3 Funda lo mhlathana ungezantsi uze uphendule imibuzo elandelayo:

<p>1 UNandi Mngoma uyacula kwaye ungumsasazi weTV. UNandi ukwanguye nomdlali kwi<i>Mzantsi Magic's The Road</i>. Uthi uNandi kumnandi ukuba ngumlinganisi. Bonke abadlali bafana nosapho kuye. Ukuba ngumdlali ku<i>The Road</i> kumenze wathobeka. UNandi uthi akakuyekanga ukusasaza, okwangoku usafuna ukulinganisa. Ngoku udibanisa icwecwe lakhe lomculo afuna ukulikhupha kulo nyaka uzayo.</p> <p>2 UNandi udume ngokusasaza iinkqubo zeTV, ezifana no<i>Bling</i>, u-<i>All Access Jozi</i> no<i>SuperSport</i>. Apha ku<i>The Road</i> ulinganisa uZoe. Uthi uNandi ungumntu ondwebileyo kwaye uyathetha. UZoe ungumntu othuleyo kwaye ukhuthela. UNandi uthi uyazibona kancinci phaya kuZoe xa kusiziwa kubuhlungu basemphefumleni.</p> <p>3 UNandi uthi eyona nto ayifundileyo kukuba umntu uphila kube kanye. Umntu makangavumeli uloyiko luvalele ulonwabo lwakhe. UNandi uye waphanda nzulu ngabantu abangazithembiyo waze wazama ukufunda ukulinganisa intombi eneentloni. Uthi bekunzima ukulinganisa intombi eneentloni ekuqaleni kuba ngeli xesha aqalisa oku kulinganisa ebebhala icwecwe lakhe. Ukulinganisa le ntombi ingazithembanga bekuphikisana necwecwe lakhe elithetha ngekumkanikazi yase-Afrika ezithembileyo.</p>	
---	---

[Eli nqaku lithathwe kwi*Bona Magazine*: Disemba 2015]

1.3.1 Funda kumhlathi woku-1.

- (a) Nika umsebenzi owenziwa nguNandi kumabonakude/kwi-TV. (1)
- (b) Ukuba ngumdlali ku*The Road* kumenze wangumntu onjani uNandi? (1)

1.3.2 Funda umhlathi wesi-2.

- (a) Apha ku*The Road* uNandi udlala njengabani? (1)
- (b) UNandi ungumntu onjani? (1)
- (c) Kuthiwa uNandi uzibona kancinci phaya kuZoe. Ucinga ukuba yintoni le eyenza uNandi ukuba afane noZoe? (1)

1.3.3 Funda umhlathi wesi-3.

- (a) Ukuba ngumlinganisi ku*The Road* kumfundise ntoni uNandi? (1)
- (b) Yintoni eyaba ngumceli-mgeni kuNandi kulo mdlalo u-*The Road*? (2)

[8]

30 amanqaku

ICANDELO B

UMBUZO 2 USHWANKATHELO/ISISHWANKATHELO

Funda esi sicutshulwa singezantsi uze usishwankathele ngawakho amazwi. Bhala amagama angama-60 ukuya kumagama angama-70.

QAPHELA:

- Ungabhala izivakalisi **ezintlanu ezinomthamo** ezibonisa iingongoma eziphambili;

OKANYE

- **Umhlathana** oza kubonisa iingongoma ezintlanu eziphambili.

Xa ushwankathela yenza oku:

- Fundisisa isicutshulwa ude usiqonde ukuba sithetha ngantoni.
- Sebenzisa amazwi akho kangangoko unakho.
- Musa ukujikeleza/ukushwaqa, hlala emxholweni ungalibali luphinda-phindo olungenamsebenzi.
- Ubuchule kukuba uqale usibhale ecaleni phambi kokuba ubhale owona msebenzi uqonda ukuba ufezekile.
- Nceda ulibhale phantsi inani lamagama owasebenzisileyo wakuba ugqibile ukubhala ushwankathelo.

UMNTWANA ANGAPHILA NGAPHANDLE KOKUBUKELA UMABONAKUDE

U-Anna Rodrigues ongumcebisi *netherapist* uthi iteknoloji nomabonakude bangenza umntwana ayeke ukudlala nokufunda izinto. Uthi umntwana obukela umabonakude kakhulu angangabinakho ukuchitha ixesha nabantakwabo nabahlobo nabazali. Umabonakude akacingisi, ungamenza umntwana angasebenzi kakuhle esikolweni. Xa umntwana eqalisa isikolo kunganzima kuye ukuba amelane neemfuno zesikolo.

Ukuhlala phambi komabonakude ixesha elide kungabangela ukuba umntwana atye ukutya okungalunganga kakhulu. Kwaye xa oko kutya kuhamba nokungashukumisi umzimba, umntwana uza kutyeba. Umntwana obukela umabonakude uvele angabinamdla aze azibhaqe engenayo enye into yokwenza ngaphandle kokubukela nje into eyenzeka kumabonakude nokuba akeva okanye aqonde ukuba kuthethwa ngantoni. Nokuba akayiqondi into ethethwayo, ujonganga nje imifanekiso aze acingele ukuba kuthethwa ngantoni.

Ukubukela ubundlobongela kumabonakude kunegalelo elibi kakhulu emntwaneni. Kungamenzela ixhala nentiyo; umntwana angahlala enoloyiko lwento angayaziyo, okanye aphele engaboyiki ubundlobongela. Umntwana angaphela ecinga ukuba xa ufuna izinto zenzeke kufuneka ube yindlobongela.

Umntwana angafunda imikhwa/imikhuba enobungozi efana nokuqhuba usele utywala, ukutshaya, ukusebenzisa iziyobisi nokwabelana ngesondo ungatshatanga. Kungabonakala njengento entle into yobomi "baseHollywood". Oku kungabangela abantwana bangahloniphi abazali nabantu abadala.

Umabonakude unendawo yawo ekhaya kodwa kufuneka kubekho imithetho elawula ukubukelwa kwakhe. Mayigadwe into ebukelwa ngabantwana. Inkqubo abazibukelayo mazikhethwe ngabazali. Makungabikho oomabonakude emagumbini okulala. Makungabukelwa mabonakude ngexesha lesidlo sangokuhlwa okanye xa kusenziwa

umsebenzi wesikolo. U-Anna ukhuthaza ukuba usapho lubukele iinkqubo zosapho ezifana nezemidlalo, iimuvi zabantwana neenkqubo zemfundo. Ucebisa ukuba ungashiywa udlala umabonakude kuba oku kukhuthaza abantwana ukuba bavele babukele kuba ulayitiwe.

Zininzi iindlela abangazonwabisa ngazo abantwana ngaphandle kokubukela umabonakude. Oku kuquka ukudlala phandle, abantwana bangadlala oojingi, undize, njalo-njalo. Ukudlala imidlalo yebhodi okanye *ipuzzle*, ukufunda, ukujayiva nokumamela umculo zezinye izinto ezinokwenziwa ngabantwana. Ukudlala iikhadi nokuba nento yokwenza efana nokupeyinta nokunitha kungabonwabisa abantwana.

[Eli nqaku lithathwe <www.bona.co.za>]

10 amanqaku

ICANDELO C

UMBUZO 3

Unyanzelekile ukuba uwuphendule lo mbuzo:

Phendula yonke imibuzo ekweli candelo.

UMBONGO ONGAMISELWANGA

3.1

UMCULO	
1	Umculo, umculo, umculo! Abanye bacula ngomlomo; Abanye bacula ngeekatari, Amagubu, iipiyano.
2	Yitalente entle ephilisayo. lingcinga ezimbi ziyemka. Sisipho esilungisa ingqondo. Umphefumlo uzole emntwini.
3	Sisixhobo esinamandla soomama; Usana luthuthuzelwa luthule, Lulale yoyi ngomculo; Kulawule inzolo ekhaya.

[J. N. Mdekazi no T. N. Kabanyane]

3.1.1 Kwisitanza *soku-1*. Imbongi isebenzise esiphi isixhobo solwimi? **Khetha** kwezi mpendulo zilandelayo:

- (a) Imfano-zandi
- (b) Uphinda-phindo (1)

3.1.2 Kwisitanza *sesi-2*.

- (a) Nika **isithetha-ntonye** seli binzana lilandelayo:
Yitalente. (1)
- (b) Xela izinto zibe mbini ezenziwa ngumculo emntwini. (2)
- (c) Nika umzekelo ube mnye wamagama amabini azizichasi kwesi sitanza. (1)

3.1.3 Kwisitanza *sesi-3*.

- (a) Nika umzekelo wesikweko. (1)
- (b) Bhala igama elibonisa ukuba umntwana ulele kamnandi. (1)
- (c) Ingaba ithetha ukuthini imbongi xa isithi, "Kulawule inzolo ekhaya"?
Khetha kwezi mpendulo zilandelayo:
- (i) Kulawule uxolo.
- (ii) Kulawule amazolo. (1)

- 3.1.4 Kuwe, mfundi, umculo unafuthe lini okanye ubuchaphazela njani obakho ubomi/ubomi bakho? (2)
- [10]

IMIBONGO EMISELWEYO: (ed) R. H. KASCHULA

3.2

INDALO	
1	Kha ukhangele mfo wasemzini indalo, Nguwele-wele nguyecele konwatywe, Bubukhazi-khazi bubuqhele-qhele yindalo, Bubumbeje-mbeje zizityalo zendalo.
2	Nguntiyilo-ntyilo ziintaka zikhala ekuseni, Ngudyumpu-dyumpu ukutshona kwentlanz' emanzini, Nguyalu-yalu nongxashi-ngxashi abantu bayaphangela, Suk' endleleni watywa ziinyosi zixakekile zenz' ubusi.
3	Nguwashiywa ukusukelwa kwezimvu nguDyakalashé, Nqandani kaloku nants' imfene isidla amatakane, Nguphithi-phithi ziimbovane zithwal' imithwalo, Zole amavila onwabile agcakamel' ilanga lehlobo.
4	Ngugquthe-gquthe emasimini amadoda ayalima, Ngugqum-gqum kunzima kuzindudumo kweli, Ngumenye-menye kulanyaz' imibane luyiko, Nguwaca-waca nentshabalalo kaloku sisichotho.
5	Kulilanga kaloku bathi kuyabhujwa yimbalela, Bayazalwa bayatshona, kulilanga kuyingqele, Yimincili kulusizi yindalo injalo manene, Siyavuya kuba sinethamsanqa sidaliwe.

[V.M. Jack]

3.2.1 Kwisitanza *soku-1*.

- (a) Caphula umqolo/umgca obonisa ukuba:
Indalo intle. (1)
- (b) Ucinga ukuba yintoni ebangela ukuba abantu bonwabe? (1)

3.2.2 Kwisitanza *sesi-2*.

- (a) Imbongi ithi iintaka zikhala nini? (1)
- (b) Ithetha ukuthini imbongi xa isithi: "Nguyalu-yalu nongxashi-ngxashi abantu ..."? (2)

3.2.3 Kwisitanza *sesi-3*.

- (a) Ucinga ukuba kutheni izimvu zisukelwa nguDyakalashe? (1)
- (b) Bhala **isifanekisozwi** esinentsingiselo enye neli gama "**cwaka**". (1)

3.2.4 Kwisitanza *sesi-4*. Imbongi ithi izulu linjani? (1)

3.2.5 Kwisitanza *sesi-5*. Ithini imfundiso evela kulo mbongo? (2)

[10]

3.3

IKHAYA	
1	Nokuba lenziwe ngantoni lilo, Nokuba ulibona lingakanani ikwalilo, Nokuba umkile kulo, ubuya ililo, Nokuba uyalicekisa lihlala lililo.
2	Wakhiwe wakhulela usakhelwa lona, Lisisihombo nesivatho sakho lona, Lingumkhuseli nomkhangeli wakho lona, Lithande ulixabise, liyakuthanda lona.
3	Awungomkanja likhona nawe elakho, Utshiphile wena walahla elakho, Kanti liyakukhumbula kuba lelakho, Yiza kulo kuba likhaya lakho.
4	Xa ndingamkeleki elizweni, Xa ndingasafunwa esizweni, Ndakujika ndikhombe umbombo ngemva, Ndibhekise ngasekhaya ndiyafuneka.
5	Ndifika ndibungezelelwe zizinja, Ndifika ndincunyelwe ngabatshana, Ndiva vumba limbi ndivuye, Ndivuyele ukuva iindaba zekhaya.
6	Kuxoxwa ezoxolo nditsho ndixole, Ndixole ndixolele ukuxoka ndiqhula, Sitsho sigigitheke sihlale sixolile, Ngokufika sisonke kwakhona ekhaya.

[L. M. Mda]

3.3.1 Kwisitanza *soku-1*.

- (a) Shwankathela ngesivakalisi esinye okuthethwa yimbongi kwesi sitanza. (2)
- (b) Bhala igama elithetha into enye neli "**uyalinyelisa/uyalinyemba**". (1)

3.3.2 Kwisitanza *sesi-2*.

- (a) Nika isixhobo solwimi esisetyenziswe yimbongi kwesi sitanza. (1)
- (b) Bhala umgca/umqolo othetha ukuba "ukhuliswe waqeqeshelwa ikhaya lakho". (1)

3.3.3 Kwisitanza *sesi-3*. Ithetha ukuthini imbongi xa isithi:

"Awungomkanja"? (1)

3.3.4 Kwisitanza *sesi-4*. Imbongi idlulisa umyalezo obalulekileyo ngekhaya. Ingaba uthini lo myalezo? (2)

3.3.5 Kwisitanza *sesi-6*. Caphula umgca/umqolo obonakalisa **isingqisho** ube mnye. (2)

[10]

30 amanqaku

ICANDELO D

UMBUZO 4

Jonga ngenyameko le **powusta** ilandelayo uze uphendule imibuzo:



- 4.1 Ngowuphi lo mdlalo ubhengezwa apha?
- 4.2 Lo mdlalo uphakathi kwawaphi amaqela?
- 4.3 Udlalwa ngomhla wesingaphi/ngolwesingaphi?
- 4.4 Udlalwa ngabani ixesha?
- 4.5 Ucinga ukuba kutheni kusetyenziswe ifonti enkulu xa bekubhalwa, "AMAKHOSI vs AMABHAKABHAKA"?
- 4.6 Caphula amagama asetyenzisiweyo akhuthaza ababukeli ukuba baye kuwubukela lo mdlalo?

[6]

UMBUZO 5

Bhala kwakhona ezi zivakalisi zilandelayo uze ufakele **izivumelanisi** ezifanelekileyo:

- 5.1 Ilitye _____yawa.
- 5.2 Intombi ya (umXhosa) intle.
- 5.3 Abantwana abana (imbeko) bayathandeka.
- 5.4 Umfundi uhamba _____thetha yedwa.
- 5.5 Sifike abafazi _____thandaza.

[5]

UMBUZO 6

Bhala esi sivakalisi kula **maxesha alandelayo:**

"Umfazi uthenga iilekese."

6.1 Kwixesha elizayo.

6.2 Kwixesha elidlulileyo.

6.3 Kwixesha eladlulayo.

[3]

UMBUZO 7

Bhala ezi zivakalisi uze ulungise igama elibiyelweyo:

Umzekelo: Yiya (ivenkile)

Impendulo: Yiya **evenkileni.**

7.1 Abafundi bafunda (isikolo).

7.2 Xhoma umfanekiso (udonga).

7.3 Beka iipleyiti (iitafile)!

[3]

UMBUZO 8

Bhala kwakhona ezi zivakalisi zingezantsi uze usebenzise **isifanekisozwi** esifanelekileyo.
Khetha kwezi zibiyelweyo:

(krwe; yaka; cwaka; qhu)

8.1 Ingca iluhlaza _____ .

8.2 Yizalise itanki ithi _____ngamanzi.

[2]

UMBUZO 9

Bhala ezi zivakalisi zilandelayo **kwisenziwa:**

9.1 Amapolisa abamba amasela.

9.2 Ubhuti umpompa ivili.

9.3 Abafazi babhaka izonka.

[3]

UMBUZO 10

Nika **isini sobukhomokazi** sesibizo esibhalwe ngqindilili. **Musa** ukusibhala sonke isivakalisi:

10.1 Kufike **ukumkani** yamaXhosa.

10.2 Ekhaya kuxhelwe **inkunzi yegusha**. [2]

UMBUZO 11

Bhala kwakhona ezi zivakalisi **kwingxelo-ntetho**:

11.1 Utata: "Lo mntu ngubani na?"

11.2 UTafara: "Shu! Kushushu eKapa." [2]

UMBUZO 12

Bhala kwakhona la magama abe **kwisimnini**:

Umzekelo: Into ukusela.

Ipendulo: Into yokusela.

12.1 Igumbi ukuhlala.

12.2 Ibrashi iinwele. [2]

UMBUZO 13

Bhala kwakhona ezi zivakalisi uze ufakele **isivumelanisi sesichazi** kumagama akwizibiyeli:

13.1 Umandisa unxibe ilokhwe (khulu) kakhulu.

13.2 Iinwele zikaJoyce (hle). [2]

30 amanqaku

Ewonke amanqaku: 100